

金

石

萃

編

金石萃編卷一百十七

賜進士出身 誥授光祿大夫刑部右侍郎加七級王昶撰

唐 七十七

湯華墓誌

石橫廣二尺一寸五分高一尺五寸四分二十三
行字數十九或十七至二十一不等正書在鄞縣

唐故福州侯官縣丞湯府君墓誌銘

并序

鄉貢進士林珽述

湯有大德於天下戴之如日仰之如春其後也君諱華
字知新曾祖備祖寶孝岳皆簪組相繼官烈當時頗有
功於國以載於譜誄此略而不書公幼耽墳藉將欲振

於時立大來之器以晨昏是切仕不擇祿釋褐衡州
參軍珪璋美瓌州縣良才記室之芳袂罷猶在再調授
福州候官丞口惣感口場人不告勞征賦皆集口馴雉
之化致象雷之聲謀而有方簡以莅事授亮而庶務皆
決正色而羣吏瞻風公之器用未盡體遠祿滿寓居南
方以口風有殊瘴癘所染沉痾既構天壽不遐以大中
十一年六月五日終于嶺中連江邑之客第春秋五十
八道路巨慟風雲助悲先確殯于竹林原夫人瑯琊郡
王氏故衡陽縣明宰之女以禮節奉君子以慈和訓閨
門感形影之未亡歎梧桐之半死望故鄉以泣血泛滄

溟以護喪蓬首逝波沒身徇義艱險不憚旌旄之口今
古罕及男二人長曰宗鉉次曰宗鎬女五人咸匍匐口
地哀號訴天以日月有時奄夕斯議以大中十二年十
一月廿八日歸葬于明州鄞縣龍山鄉江上里庚向之
原禮也銘曰

循与短兮胡可知 聖与賢兮莫能窺 器未展兮誠
足悲 口口有限兮淚如絲 哭丹旄兮一家隨 風
九原兮滿松枝

按湯華兩唐書無傳誌不詳華之里居据後云歸
葬于明州鄞縣則當是明州人也唐書地理志鄞

縣開元二十六年以前屬越州以後新置明州鄞
縣屬焉其官候官丞其卒在連江客第並福州屬
邑誌云先確殯于竹林原確字見集韻音啐殘敗
也與下文殯字不合疑爲權字之訛誌又云泛滄
溟以護喪蓬首誌說逝波沒身徇義艱險不憚云
云是浮海護喪而歸也又云葬于龍山鄉江上里
庚向之原葬用某向是今堪輿家羅經之術始見
于此

柱國告石刻

袁本高廣行字
皆不計正書

將仕郎權知幽州良鄉縣主簿范隋

右可柱國

勅朝散大夫尚書水部郎中穆栖梧等渙汗鴻恩必乘
其雷雨頌宣爵賞用振其簪纓以爾等列我盛朝累霑
霈澤各有勞効許其叙錄行慶策勲於是乎在可依前
件

咸通二年六月十一日

檢校司徒兼中書令使

中書侍郎兼工部尚書平章事臣杜審權宣奉

駕部郎中知制誥臣王鐸行

奉 勅如右 到奉行

咸通二年六月十二日

檢核司徒兼侍中使

右僕射兼門下侍郎平章事恁

給事中馮

告將仕郎前權知幽州良鄉縣主簿柱國范隋奉 勅
如右符到奉行

主事吳亮

員外郎

令史楊鴻

書令史

咸通二年六月 日下

右六世祖所受懿宗告也先世文書自經喪亂十七
八九此書獨存於三百年干戈之後子孫保之當何
如耶紹興三年八月朔裝禡于廣州官舍右朝奉郎
權發遣廣東路轉運判官正國謹書

右子儀六世祖柱國告以其時考之檢校司徒兼中
書令使者白敏中以是官爲鳳翔節度使也左僕射
兼門下侍郎平章事棕者杜相也以檢校司徒出使
有崔鉉鎮襄陽令狐綯使河中而兼侍中則未之考
焉當侯博雅君子紹興己巳三月晦日穎川曾幾書

按唐書百官志官吏勲級凡十有二轉爲上柱國視正二品十有一轉爲柱國視從二品此告范隋以良鄉縣主簿而告曰可柱國不知其勞効居何等也勅首云水部郎中穆栖梧等當時同奉此勅而叙錄者不知凡若干人范隋特其一耳勅奉于咸通二年六月其時朝廷無事本紀不載有行慶策勲之特典不知勅所謂渙汗鴻恩必乘雷雨者果何事也告中列銜檢校司徒兼中書令使曾幾云是白敏中以是官爲鳳翔節度使稽之宰相表及兩書白敏中傳皆同又中書侍郎兼工部尙書

平章事杜審權宰相表乃咸通元年九月所加而舊傳云懿宗卽位召拜吏部尙書新傳云懿宗立進同中書門下平章事再遷門下侍郎各不同王鐸爲駕部郎中知制誥兩傳同又檢校司徒兼侍中使曾幾云以檢校司徒出使有崔鉉鎮襄陽令狐絢使河中而兼侍中則未之考焉崔鉉傳宣宗時檢校司空咸通初徙山南東道荆南二鎮未嘗檢校司徒兼侍中則非崔鉉明矣令狐絢舊傳大中十三年罷相檢校司空同中書門下平章事河中晉絳等節度使咸通二年改汴州刺史宣武軍

節度使亦未嘗檢校司徒惟新傳云未幾檢校司徒爲河中節度徙宣武而未嘗兼侍中則非令狐綯亦明矣惟白敏中舊傳云懿宗卽位徵拜司徒門下侍郎平章事復輔政尋加侍中新傳及表皆不云加侍中新傳云南蠻擾邊乃出爲鳳翔節度使兩傳叅攷則司徒兼侍中而出使者仍是白敏中也右僕射兼門下侍郎平章事怲者曾幾云杜怲也但表及怲傳俱作左僕射與碑異

福田寺三門記

表本高廣行字皆不計行書在鄂都縣

唐虔州零都縣福田寺三門記

鄉貢進士楊知新述

夫立有爲之績卽無爲也始于毫髮旋彙成大因泛性
起入法空海蕩蕩而稱焉莫曰構梵刹貯像生口巍巍
如星中月發輝晦恡且教西騰出鎮中國自姬垂代迄
今聖朝頌口口紀經歷戡滌瑕緇更殛取銀清流
甚者默奉禁儀如農夫之望歲泊乎 我上踐極鴻口

西化天下熾焉且福田寺者梁天鑒年中之建號比雖
暫墜前蹤今進后跡有洛山離塵禪口師之門人性常
早傳師印致遠深旨目睹葦葢敷敦异浮榮斗藪塵機得

獲三昧寒灰羸縷不味馨羞善引三車昏徒盡悟發荆
臺榭似箭從弦悟卽色而空達有作而無作於茲寺造
長廊三十餘間又建弥勒院未經重序朱軒素壁周迴
奪目布邑沸騰艾稚咸訝闍寺僧徒與檀越話議殿廊
旣成三門未立誰能爲哉若弗斯人在萬甲子同辭啓
白師納來心頃刻之間千里早應車騎爭至繪紉上服
異器名珍將投起阜遂俾市材礎擇良工日驟其績可
分二秋工人告畢峩峩然且門闢三道梵典彰然劫終
如來以禦邪祲今飾殊常卽師之新意簷綴珠網籠鴈
拱之聯飛瓦作翠鴛接清風之迅翼丹楹刻楠藻暈閒

扉地發瑠璃四垂金鐸挂風箏而動韻稟律呂與天籟
之齊音鳴鐸琤琮響震非非之想且德化遐分狀秋天
之朗人思仰睟豈異大鑒之化行夙夜讚揚聲走寶瀛
之外遂邑之信士迨乎前績宵想歲更寒暑遷迭若弗
縉錄湮沒其由今盡庀略使深於代厥有徒衆僧之佳
号及一境檀那師今咸列姓宇於虹梁之上知新學劣
詞荒確乎不拔利之不利俟時而進有命爲文迺持筆
書之將刻於石咸通壬午之三年九月十有一日記

南嶽李少鴻書并篆兼錫

前寺主僧會增

寺主僧從約

上座僧德贊

都維那僧惟貞

都勾當立碑僧惠圓

按雩都縣唐書地理志屬江南西道虔州南康郡
福田寺今謂之明覺寺江西通志明覺寺在贛州
府雩都縣西門外卽福田舊在大昌村梁天監中
建唐開元遷今所碑云天鑒建號鑒監通用也而
開元遷今所碑未叙及碑云斗藪塵機斗藪與抖
藪抖擻通用揚子方言齊曰鋪頒猶秦晉言抖

藪也郭璞注謂抖藪舉素物也集韻亦云抖擻舉
素物也碑云僧之佳號及一境檀那師咸列姓字
于虹梁之上此卽後世題梁之所昉記作于咸通
三年壬午然云咸通壬午之三年則倒置而冗矣

龍華寺宰塔波塔銘

石高一尺六寸五分廣一尺九寸五分
二十二行行十八字正書在咸陽縣

宰塔波塔銘

并序

布衣高壩述并書

夫性本聰敏執心謙沖推善讓人曾不自伐事鄉
鄉曲欽承理家道而家道篤睦者厥有周文王毛

裔國內國崇之昆季也仁孝並舉義讓克修雖古高柴
田真難可將比焉 祖立職轅門妙閑弓矢正直在已
匡救邦家吾 君賞其勲勞延及後嗣 父敬承先祀
相紹無恙上令下從罔墜基緒書曰功加于時德垂後
裔斯之謂歟暇日昆季議曰 阿翁遺意保厥孫謀
衣食粗充心思上報既而上下協睦同望勝因乃召匠
選石施功琢削磨礱既就崇宰堵波是日功終立于營
所其地則北視橫山南鄰畢陌東西逾遠故号洪川意
望將此勝因資及 七代先靈并亡兄姊妹等願神
識不昧得覩真容弥勒佛前親承 聖旨現存孫息

眷屬等福樂無窮壽等青山福同滄海願法界衆生普
悉此福乃爲銘曰

天雖高方尺寸可知地雖原方里數可期海水深方毛
滂記之大地廣方微塵无道烏兔交方四時有盡立窳
堵方福布无涯

時咸通五年歲次甲申八月乙卯朔廿六日庚辰建
立

右窳堵波塔銘布衣高墉述并書案釋元應一切經
音義云寶塔諸經論中或作藪斗波或作塔婆或云
兜婆或言偷婆或言蘇偷婆或言脂帝浮都亦言支

提浮圖皆諺略也正言窳覩波此譯云廟或云方墳
此義翻也案元應以窳覩波爲正此又作堵譯音元
無定字也窳堵波與塔卽非二物此題云窳堵波塔
重複無當蓋唐人不知梵義者爲之耳予嘗謂古無
塔字唯葛洪字苑有之云佛堂也音它合反見一切
經音義
佛元應所述諸文斗也兒也帝也覩也皆與荅聲相
近釋教初入中國塔婆字本當爲荅後人增加土旁
而稚川承之其音爲他合切者又卽偷婆之轉聲也

石文跋尾

按碑云周文王毛公苗裔通志氏族略毛氏周文

王之子毛伯明之所封世爲周卿士食采于毛子孫因以爲氏又云漢有毛公治詩趙人也此碑所稱毛公卽謂毛伯明泛言公耳碑叙國泃國崇之祖父不著其諱祖立職幃門

立職當是列職

妙開弓矢是

武職也而不詳何官云父敬承先祀相紹無差是無官者矣碑云其地則北視橫山南瞻畢陌太平寰宇記畢原亦謂之畢陌長安志畢原在咸陽縣北三輔故事曰文王武王周公皆葬畢陌南北關中記曰高陵北有畢原陌元和郡縣志畢原無山川陂湖亦謂之畢陌陝西通志咸陽縣寺觀無龍

華寺所謂翠堵波者已無攷矣碑云福樂無窮福樂二字初見下云壽等青山福同滄海亦後世善頌之詞所昉也銘云毛滂記之毛滂二字見地藏經云一毛一滂一塵一沙蓋毛同毫滂同滴也

後魏昌黎馮王新廟碑

碑連額高四尺五寸廣二尺四寸五分二十四行行三十二字正書額題後魏昌黎馮王新廟碑九字篆書在偃師縣西三十里鋪北

後魏洛州刺史侍中兼太師昌黎馮王新廟碑

十二代孫鄉貢進士歸德述

弟進士魯度象額

弟進士顯錫書

于諱熙字晉國冀州長樂人也伯祖諱跋建國北燕傳
位於昭成皇帝諱皝卽 王之烈祖也魏太武帝滅

北燕徙其家屬於代 王以帝者子孫遂交婚於魏

室魏文成帝納 王妹爲后卽文明太后是也

王尚博陵長公主以敦慎博愛歷事三朝累拜冠軍將
軍侍中中書監太傅太師之任進爵昌黎王及魏孝文
帝卽位前後取 王三女其二爲后一爲昭儀文明

太后臨朝 王以師傅之重寵極禁臺內不自安求

外任爲洛州刺史侍中太師如故洛陽經永嘉大亂之

後宮寺毀廢 王爲政仁恕而酷信釋教凡出俸祿於諸州鎮建佛圖精舍合七十二處今之廟地舊建北邙寺乃其一也今佛圖基址尙存其寺碑文中書侍郎賈元壽所製孝文每登寺讀碑佳歎不已後徵歸代遇疾而薨屬遷居洛京遽詔有司爲辦喪事公主先薨命開其墓併二柩俱向伊洛皇太子赴代迎吊將葬贈假黃鉞侍中督十州諸軍事大司馬太尉冀州刺史加黃屋左纛備九錫前後羽葆鼓吹有司奏諡曰武孝文爲撰誌銘纓服親臨墓所以前魏書備載其事但不言封樹之處及廟止之由墓與廟當不相遠也其廟豈州人

思王之德衆所建乎不然寺沙門所置也至今爲
洛北之望祀年代寤遠雖性牢日享而室壁彫頽大中
六年六月洛之豪族孟州長史焦宗美特捨家財大新
厥宇兵衛儼列廟貌益崇愚別墅寄溫谷川東走十里
直王之廟每見遠近里社坎鼓吹管以趨之及問

王之名位爵邑皆失其傳乃乘暇謁拜碑版堙滅
莫識何從退尋家諫考於魏史是知卽愚之十二

代祖也伏念甘棠勿翦卻德實思若非續化深洽民心
卽何能五百年之後而血祀不絕乎恐盛烈沉翳無復
彰明不敢多文遂斲石重紀

全石志卷之二
三
大唐咸通八年歲次丁亥十一月壬子九日甲辰刻
十二代孫 儼 規 儼 貺 儼 範 儼 質 儼 靜 并
前八人同建立

孫璋鐫

按廟碑爲馮熙十二代孫元德等八人斲石重紀以
好事者揚摹不及石幸得完好其文序列馮熙事跡
並依魏書然攷熙本傳熙長樂信都人今碑則云冀
州長樂人元德所述蓋以唐地里爲據非其實也又
碑言洛陽經末嘉大亂之後官寺毀廢質之傳文洛
陽雖經破亂而舊三字石經宛然猶在熙與常伯夫

相繼爲州廢毀分用大至頽落則石經敗沒熙實爲首俑而碑惟以末嘉之亂歸於兵火焚棄嗚呼此豈足以益厥愆與傳載熙爲政不能仁厚而信佛法碑反言爲政仁恕其過爲曲諱尤不可掩者余故備著之以見子孫溢美之詞非其實也

偃師金石遺文記

右碑大略云王之名位爵邑皆失其傳碑板埋滅莫識何從退尋家牒攷於魏史知卽愚之十二代祖是則神之名字本無可攷特出於元德輩之傳會耳熙以外戚貴盛本無才能其在洛取人子女爲奴婢有容色者幸之爲妾号爲貪縱營塔寺多在高山秀阜

傷殺人牛有沙門勸止之熙曰成就後人唯見佛圖
焉知殺人牛也此其爲政豈有功德及人而能廟食
百世者馮君之名不傳後代要當疑而闕之若執此
誣妄之詞以爲左證非勸善之義矣碑末題十一月
壬子九日甲辰尤爲舛謬若壬子爲月朔日則九日
是庚申非甲辰若甲辰是月之九日則朔日當是丙
申且壬子在甲辰之後不應倒置若此攷溫公通鑑
目錄推是歲十一月果是丙申朔可據以正碑之誤

潛研堂金
石文跋尾

按偃師縣志有寺有廟皆稱馮王寺在北邙山洛

陽伽藍記北邙山上有馮王寺其父馮熙傳北芒寺碑文中書侍郎賈元壽詞孝文頻登北芒寺親讀碑文稱爲佳作云云今碑亦有此語碑又云今之廟地舊建北邙寺是北邙寺乃馮熙所建佛圖精舍七十二處之一而其後乃建馮王廟也縣志云廟在縣之義井鋪俗曰馮王廟卽北魏平等寺也寺重修于北齊太宰馮翊王高潤土人誤稱馮翊爲馮異遂呼爲馮王廟又去兩點旁曰馮王廟是馬王爲馮王之訛而此馮王是指馮翊與馮熙之稱馮王者別且廟是平等寺基與馮熙建北邙

寺基者又別碑云熙卒孝文爲撰誌銘魏書備載其事但不言封樹之處及廟立之由墓與廟當不相遠也稽之偃師縣志載馮熙墓在縣西三十里舊志在鳳凰山上劉家坡保內今有碑人以爲馮異非也熙三世后戚以功封昌黎王爲洛州刺史有功德于民故廟祀之是馮王廟在馮熙墓前墓在鳳凰山與邙山相近此廟正卽北芒寺基與平等寺之馮王廟誤以馮翊爲馮異者別据志語則偃師人不獨誤以馮翊之馮王爲馮異且誤以馮

熙墓亦爲馮異矣碑云王諱熙字晉國

北史傳同魏書作晉

晉冀州長樂人魏書北史傳皆作長樂信都人蓋
冀州在漢爲信都國在魏晉爲長樂國後魏齊周
皆爲冀州長樂郡治信都縣故冀州長樂與長樂
信都異而同也唐書地理志但有冀州信都郡信
都縣之名而無長樂偃師金石遺文記謂爲元德
所述以唐地理爲據者亦未然也碑所叙熙事大
都本之魏書北史故語多與兩傳合碑云愚別墅
寄溫谷川東走十里直王之廟檢偃師縣志山川
卷內無溫谷川之名惟有鄆水一名鄆谷水在縣
東北十一里一日溫泉活地志溫泉卽鄆谿出洛

州華縣西南四十里明一統志鄠谿其源有二俱
在邛山之麓似印碑所謂温谷川也碑書壹作壺
別體字其自稱曰愚亦始見于此末云歲次丁亥
十一月壬子九日甲辰据碑壬子無朔字則壬子
非朔也唐碑曾有書月建而不書朔者丁亥歲十
一月是建壬子也

劉遵禮墓誌

石高廣俱三尺九寸二分四十分行四十字正書
蓋題唐故彭城劉公墓誌銘九字篆書在西安府

唐故內住宅使銀青光祿大夫行內侍省內侍員外置
同正員上柱國彭城縣開國子食邑五百戶賜紫金魚

袋贈左監門衛大將軍劉公墓誌銘并

翰林丞 旨學士將仕郎守尚書戶部侍郎知制

誥賜紫金魚袋劉瞻撰

中散大夫前左金吾衛長史兼監察御史崔筠書并

篆蓋

公諱遵禮字魯卿帝堯垂裔實分受姓之初隆漢敦興
更表昌宗之盛靈源弥遠瑞慶斯長史不絕書代稱其
德 曾祖諱英皇任游擊將軍守左武衛翊府中郎將
韜鈴奧術倜儻奇材運阨當年位不及量僖伯有後累
生 英賢烈祖諱宏規皇任左神策軍護軍中尉特進

行左武衛上將軍知內侍省事贈開府儀同三司揚州
大都督沛國公佐佑 累朝出入貴仕文經武略茂績
嘉庸著山河勲銘金石 訓傳令嗣慶集 德

門卽今

開府儀同三司內侍監致仕徐國公名行

深也公卽

開府第五子穎悟於齡亂溫克於

童蒙孝敬自稟於生知忠恪允符於夙習爰當妙齒卽
履宦途以寶曆二年入仕重位要權爭用爲察察資鴻
漸之勢俟麟角之成雍容令副遜讓美秩開成五年方
賜緣授將仕郎掖庭局宮教博士充宣徽庫家地密務
殷選清材稱舉止有裕階資漸登會昌元年授登仕郎

四年授承務郎常在 禁闔日奉 宸扈皆貴游之

子弟爲顯仕之梯媒清切無倫親近少比特加命服仍
領大醫六年賜服銀朱加供奉官轉徵仕郎內僕屬令
充監醫官院使親承 顧問莫厚於宣徽榮耀服章無
加於紫綬其年六月授宣義郎改充宣徽北院使十

月賜紫金魚袋階秩表仕進之績爵邑列 恩寵之

榮旣屬上材因降 優命大中二年授朝散大夫彭城
縣開國子食邑五百戶密侍右遷樞軸備邊防經制
才略所先公論咸推 帝命惟允五年改充宣徽

南院使尋兼充京西京北制置堡戍使壇場設備今古

重難俾無奔突之虞用致煙塵之息凡所更作大叶機
且與能嚙勞換職進秩其年使迴改大盈庫使旋授宮
闈局令夫良弓勁矢武衛戎裝器号魚文名掩繁弱帑
藏之貯 進御是須多資峻嚴以綰要重七年改內弓
箭庫使又以上田甲第職夥吏繁 禁省之中号爲難
理苟非利刃寧愆劇權八年改內非宅使出護戎機實
爲重寄受歷試之選膺貞律之求爰以周通遂俞推擇
九年改充海監軍使共綏武旅勞協師臣儻非其材亦
罕濟用雅聞懿績頁莅確藩十二年改鄆州監軍使出
入之且勞逸是繫履踐之美重杏爲優十三年赴 闕

明年授營幕使其年再領弓箭庫使咸通元年十二月
轉掖庭令雲騎注產驥子龍孫當星馳電逸之場列中
皂內閑之藉寶鞭玉勒足踈首驥繫於伯樂之知懸在
伏波之式鑿精事重匪易其人三年遂授內飛龍使休
聲益暢 睿渥弥敷進於崇班示以懋賞四年授
內侍省內侍地控西陲任當戎事思得妙略冀絕邊虞
五年改邠寧監軍外展殊勲內缺要務人思舊政

主洽新恩七年復拜內住宅使 顧遇益隆兢謹愈
至將申大用先 命崇階八年授銀青光祿大夫嗚呼
得君逢時材長數促性命之際賢哲莫窮咸通九年孟

夏邁疾 僂旨許歸就醫藥鍼砭無及湯劑徒施莫逢
西域之靈香遠歎東流之逝水以其年六月十四日薨
於來庭里私第享年五十三八月五日 詔贈左監門
衛大將軍竊惟 開府以仁誼承 家用忠貞事

主德齊高華量廣滄溟便蕃顯榮洋溢功業掌鈞軸則
弥縫 大政縮戎務則訓齊全師勤以奉公寬而濟衆
書于史冊播在 朝庭故得朱紫盈門輝光滿目 公
之仲季時少比倫並以出人之材各奉趨庭之訓優秩
佳臧後弟前兄而 公不享遐齡豈神之孤衆望也是
以 開府惋惜輒極悲懷 夫人咸陽縣君田氏四

德咸臻六姻共仰婦道克順母儀聿修有子四人長曰重易給事郎內侍省內府局丞次日重允宜徽庫家登仕郎內侍省奚官局丞又其次曰重益曰重則並已賜諡皆以孝愛由己明敏居心在公處私克守 訓範以

似以續家肥國華今則喪過乎哀悵焉在疚宅兆既卜

日月有時十一月八日銜哀奉 喪窆于萬年縣崇義

鄉漣川西原禮也佳城末闕 昭代長違生也有涯

前距百齡纔及半死如可作後游九原當與歸瞻叨賦

內廷特承 宗顧刊刻期於不朽叙述固以無私銘

曰

積德之孫 大勲之嗣 允文允武 有材有位 既
遇 明時 將膺 寵寄 樞機之任 咫尺而至
命不副才 期而爽遂 崇崇德門 伋伋令子 垂
裕後昆 流千萬祀

鐫玉冊官邵建初刻

誌近出土完具無缺劉君諱遵禮字魯卿自筮仕至
終沒皆兼使職撰文者劉瞻新唐書有傳云劉瑛執
政薦爲翰林學士拜中書舍人進承旨出爲河東節
度使咸通十一年以中書侍郎同中書門下平章事
宰相世系表今誌瞻題銜翰林學士承旨守尚書戶
作咸通十年

部侍郎與世系表合而守尚書戶部侍郎傳未之及
得此則詳略足備也書方勁似柳誠懸

授堂金石跋

按碑云開成五年方賜綠六年賜服銀朱重益重
則並已賜綠唐書車服志唐初服色之制一命以
黃再命以黑三命以纁四命以綠五命以紫腰帶
之制五品以上服小科綾羅色用朱飾以金六品
七品服用綠飾以銀文獻通考引畢仲衍中書備
對冕服條下袴褶注云紫緋綠各從本服所謂紫
緋綠卽後來之公服而非祭服朝服也唐制衣服
之色可攷者祇此碑稱賜綠大約是賜四命之綠

而云銀朱者似卽前李輔光朱孝誠等碑所謂朱
板銀章之賜其等蓋亞於金紫銀青者也然銀朱
二字連用卽見此碑

曲阜文宣王廟記

碑連額高五尺九寸五分廣三尺七分二十六行行
四十四字額題新修廟記四字並正書在曲阜孔廟
新修曲阜縣文宣王廟記

攝鄆曹濮等州館驛巡官鄉貢進士賈防撰

皇帝御寓之十年歲在己丑

夫子三十九代孫

魯國公節鎮汶陽之三載秋霜共凜冬日均和里閭無
桴鼓之聲耆艾有袴襦之詠道已清矣政已成矣於是

瞻故鄉以徘徊想

廟貞而昭悵乃謂僚佐曰伊

子

聖祖寔号儒宗英靈始謝於襄周德教方隆

於大漢爰因舊宅是構

靈祠粵自 國朝屢加崇

飾文棖繡桷雖畱藻繪之功日往月來頗有傾摧之勢
故老動淒涼之思諸生興嗟嘆之音今忝鎮東平幸迹
鄉里雖無由展敬而敢忘修營旣而飛章 上陳請以
私俸葺飾由是命工庀事飾舊加新浹旬之間其功乃
就門連歸德先分數仞之形殿接靈光重見獨存之狀
眸容穆若更表溫恭列侍儼然如將請益丹楹對聳
還疑夢奠之時素壁口標宛是藏書之後槐影疎而市

晚杏枝暗而壇孤不假大夫幽蘭自滿無煩太守刺草
全除稷門之舊業俄興闕里之清風再起旣可以傳芳
萬古亦可以作軌一時且開闢以來霸王之道言其德
也莫踰於湯武語其功也無尙於桓文墳土未乾而工
隴已平子孫縱存而蒸嘗悉絕 夫子無尺寸之

地微一掖之衆修仁義者取爲規矩肆強梁者莫不欽
崇生有厄於棲遲歿居尊於南面而樵蘇莫採廟貌長
存道德相承簪裾不絕則 夫子之道旣可章於

積善 魯公之德寔無愧於聿修防目覩 靈蹤躬

尋 盛績仰 聖姿而如在歎 休烈而難名承

命紀功讓不獲已刻諸貞石深愧菲才謹記

請修兗州曲阜縣文宣王廟

右鄆曹濮等州觀察使孔溫裕奏伏以禮樂儒學教化根本百王取則千古傳風國朝靈關文明遵尚祀典不違古制大振皇猷今曲阜縣乃魯國故都文宣廟卽素王舊宅興儒之地孕聖之邦所宜廟宇精嚴禮物具舉近者以兗州頻年災歉都廢修營徒瞻數仞之牆纔識兩楹之位雖春秋無闕於釋奠而揖讓頗紊於彝章遂使金石之音靡聞於聆響俎豆之設嘗列於荒蕪聖域儒門豈宜埋墜臣忝爲遠裔叨領

重藩咫尺家鄉拘限戎鎮望闕里而無由展敬瞻廟
貌而有願興功臣今差人賫持料錢就兗州據廟宇
傾毀處悉令修葺皆自支費不擾州縣所口獲遂幽
懇克申私誠伏緣兗州非臣本界須有申奏伏乞

天恩允臣所請無任悃迫屏營之至謹具如前
中書門下
牒鄆曹濮觀察使

牒奉
勅鄆魯故鄉俎豆遺教文武之道未墜
於地溫裕雖持戎律宛有家風屬兵車之方殷飾工
門以鑿教精新數仞廟設兩楹盡出私財不煩公用
綽有餘裕益見器能已賜嘉弊餘宜依仍付所司牒

至淮

勅故牒

咸通十年九月廿八日牒

咸通十一年三月十日本

碑側

咸通十年九月十四日鄆州勾當重修廟院同散將

畢叔建

四十六代孫宗亮

舊名

宗翰俱策進士第嘗奠謁

祖聖謹志其時皇祐五年六月日宗翰題

溫裕孔子三十九代孫能以私俸奏請葺廟宜蒙嘉
獎矣碑賈防撰文聊略未稱書者無名氏而亦有顏

清臣柳誠懸遺意不作惡札

石壘
銘華

案孔溫裕奏請修廟事在咸通十年九月廿八日勅
牒准行至十一年三月始建此碑兩側先有咸通十
年九月畢叔題名何邪溫裕附舊唐書父幾傳位京
兆天平軍節度使又見孔紆墓誌載父溫裕節制天
平軍徵拜司戎貳卿今碑述溫裕自云忝鎮東平唐
書地理志鄆州貞元四年曰東平大和四年曰天平
史就現名書之徵其實碑以舊名書之存其跡義皆
可通也碑側四十六代孫宗亮宗翰題名宗翰乃道
輔之次子宋史坊道輔傳但云登進士第以此碑攷

之當是皇祐五年也

山左金石志

按新唐書孔溫裕傳大中四年官補闕時党項爲邊患發兵討之連歲無功溫裕上疏切諫帝怒貶柳州司馬累遷尙書左丞天平軍節度使鄆曹濮等州觀察使傳不載其爵魯國公碑不詳其官尙書左丞皆可取以互證也碑側四十六代孫宗亮宗翰題名宋史附道輔傳稱宗翰登第後知仙源縣爲治有條理今碑不言知縣事殆題碑之時猶未到官也宗亮先以慶歷五年知仙源縣事八年孔彥輔代之皆碑所未詳及者碑云槐影疎而市

晚杏枝暗而壇孤唐宋諸碑從未有及槐杏者惟見此碑今曲阜孔廟詩禮堂庭中有唐槐一本枯槎一片度木架之槐之右有大杏樹一本二樹皆可千年物或卽碑所云也奏狀云金石之音靡聞於盼響碑借作盼響牒勅云飾邱門以宏教蓋卽孔門此二字已見大泉寺新三門記此勅亦云然當時習用之語也

孔行墓誌

石高廣皆三尺二寸六分三十九行行四十字正書在榮澤縣

唐故左拾遺魯國孔府君墓誌銘并序

鎮海軍節度掌書記將仕郎殿中侍御史內供奉賜
緋魚袋鄭仁表撰并書

咸通十五年三月

侍講學士右僕射太常孔公

以疾辭

內署職其元子左拾遺養疾亦病逾二旬

太常公疾少間

拾遺疾亦間又旬日

太常公薨

拾遺哭無時後七十六日亦終鳴

呼求諸古未聞也仁表與

拾遺同歲爲東府鄉

薦築第不中等再罷去明年偕宴於東堂宴之日

博陵崔公堯出紫微直觀風甘棠下表爲支使授葉

閣書

拾遺始及第乞假拜慶新進士得意歸去

多不伏拘束假限往往關試不悉集貢曹久未畢公事
故地遠迨二千里例不給告時

僕射太常公節

制天平軍以是勤不得請

拾遺曰人之多言必

以我爲宴安訖春不宴年少乘喜氣赤春頭竟不對狎
客持一盃酒人以爲難關試日都堂中指別同年徑出
青門外經所爲從事州入院判案十日東去府適罷賢
諸侯爭走羔鴈馳弓旌竟不能致 徵爲渭南尉直屬
文館久之會大學士出將 去聲 竟不就

僕射太

常公罷鎮居洛中

拾遺伏安

定省不嘗言仕

宦旋以萬年尉復怙文職無西笑意

僕射徵拜

司戎貳卿

拾遺由

侍行乃赴職越一月今許

昌太傅相國襄陽公爲河中奏署觀察判官假監察御史故事赤尉從相府得朱紱殿中

公昆仲間有

未至者求裏行官不改服色人人美譚之俄轉節度判官從知之道皎然明白和而不柔守而通內盡匡補而外若不知

相君待之異禮俄拜左拾遺內供奉嗚呼止於是何也春秋始卅三矣惜哉

公至性自生

知雖欲全其禮傳於後開強忍抑不能俯就始得疾不

言於人因晡哭若絕左右始知有病

句甚矣

句卧聖室

中不復進飽餌疾益亟方肯歸常所居舍悉名骨肉迨

僕使唯言

僕射公葬時事指揮制度必以古禮

戒誨約束委曲備悉左右皆泣

公曰吾平生無

纖小不是事天報我甚厚使亟得歸

侍地下尔盍

賀而返以泣耶吾自遂性不能無傷生全大孝送終設

祀且益儉削無以金鈔纖華爲殉無以不時之服爲殮

吾幼苦學尤嗜左氏傳所習本多自讎理宜置吾左右

友人鄭休範多知我所執守相視若親弟兄我亦常以

所爲悉道之請以誌我彼不能文必盡其實言竟撫弟

妹若將千百里爲別者視妻子若將一兩夕不面者而

怡然其容如有失而復得已而終嗚呼其喜歸

侍

乎 公謝世之月餘日前與二季處閣室中忽援毫書
廿八字於室內東展之上若隱語而加韻焉曰許下無
言棄少年震而不雨月當弦風濤渭逆鯨鯢沒從此無
舟濟大川初玉季載孝其義莫究指歸既痛絕手足若
洗然而悟曰許無言是午字今歲在午也震不雨是辰
字其哀瘵至甚移歸院就醫是辰日及 奄然之日驗
於官蠶是上弦日又應月當弦之識也吁似有所潛受
於冥昧間何懸知之若是也憶於洛陽里第始相與定
交 公曰何以契我余曰死患難先祿位託孤寄
命同休共感此義交也見善相勉也見利相遠也言之

而必行守之而必固一足離此則攻而絕之使處世爲
匪人歿身無怨言斯益友也余將與吾子契之自是過
必相攻善必相激相成如恐失相畏若臨敵雖朝夕共
行止人不以爲朋比亦君子之能賢善誘也嗚呼

公之文之學之精明道行如雷聲日光無耳目者則
不知也 公之訃始聞人人如有亡碩生鉅賢心

死氣脫道之不行也天何心焉

公諱紆字持卿

曾司寇四十代孫繼繼承承世濟不墜間生傑出
磊落相望 曾祖岑父皇任秘書省著作佐郎贈

司空 祖堯皇任禮部尚書致仕贈司徒

父溫

裕皇任檢校右僕射兼太常卿充翰林 侍講學士冊

贈司空 皇妣河東薛氏族大而顯先 司

空公廿八年卽世 公娶京兆韋氏山東清甲家

也有二子男曰鐵婢始十歲甚肖似憶與 公約

生子命名必如兄弟愚之子曰後魯他日鐵婢當以還

魯字之易云積善之家必有餘慶善之教必闡於道儒

釋釋固無嗣 皇家 公家道儒之餘慶也

公又賢而無祿其後益大以昌女少於男銘曰

嗟嗟 夫君 嗟嗟 夫君 孔聖遺靈 顏

回後身 高高者天 幽幽者神 幽幽不見

金石錄卷一百一
高高不聞

不見不聞

又何足以云云

右左拾遺孔紵墓誌紵曾祖岑父贈司空祖弢贈司徒父溫裕檢校右僕射兼太常卿充翰林侍講學士贈司空皆史所未載紵字持卿而宰相世系表作持卿刻本之訛也紵嘗爲左拾遺有子小字鐵婢表亦不載紵未沒前月餘書二十八字於東展上若隱語者唐人小說未有及此事者僖宗以咸通十四年七月卽位至明年十一月始改元乾符故咸通得有十五年也

五年也

潘研堂金石文跋尾

碑中出將下傍注去聲二字金石未有其例又云公

謝世忽授毫書廿八字其事甚奇異行爲左拾遺而稱公孔融稱康成爲鄭公漢書亦多稱人爲公是相重之詞近人作碑志執非三公不得公之論嫌其太拘也韓愈撰有王議大夫尚書左丞孔戣墓志銘云葬公於河南河陰廣武原先公僕射墓之左是紆數世皆葬于此撰人鄭仁表滎陽人有贈妓僊哥及洛真詩又有經過滄浪峽長亭走筆題句俱見全唐詩

中州金
石記

誌爲鄭仁表撰書仁表附舊唐書鄭肅傳云仁表擢第後從杜審權趙騰爲華州河中掌書記人爲起居

郎以此詩推之尙帶殿中侍御史內供奉及誌後叙
孔紆囑友人鄭休範爲誌休範卽仁表字也史並缺
書誌載仁表自叙與孔君同歲爲東府鄉薦策第不
中等罷去明年宴于口堂宴之日博陵崔公堯出柴
薇直觀風甘棠下堯本傳拜中書舍人後出爲陝州
觀察使卽記云觀風甘棠下也又叙新進士得意歸
去多不伏拘束假限往往闕試不悉集貢曹久未畢
公事故地遠迨一千里例不給口假唐摭言載唐一
代進士之制未錄及此也又載故事赤尉從相府得
朱紱殿中此縣尉得侍御史之由史志並缺錄誌內

出將句旁注去聲始知有病旁注句字甚矣旁注句

字皆金石例所無

按掌金石跋

按此碑撰書者鄭仁表書譜不列其名兩唐書皆附見鄭肅傳肅之次子新傳稱其累擢起居郎舊傳稱其擢第後從杜審權趙隱爲華州河中掌書記人爲起居郎誌結銜云鎮海軍節度掌書記將仕郎殿中侍御史百官志起居郎從六品上節度使掌書記一人未詳品數將仕郎從九品下殿中侍御史從七品下蓋仁表撰誌之年階從九品下官從七品下而充掌書記其人爲起居郎則升階

從六品上矣舊書杜審權傳咸通十一年制授檢校司徒同平章事河中尹充河中晉絳節度觀察等使趙隱附見趙隱傳隱弟隱咸通七年拜禮部侍郎御史中丞累遷華州刺史潼關防禦鎮國軍等使皆在咸通十一年以前之事至誌所結銜爲兩傳所不書鎮海軍節度掌書記不詳爲何人所辟方鎮表鎮海軍隸浙江西道始置于元和二年其後屢經廢置至咸通十一年廢而復置仁表之掌書記在鎮海軍初復之時蓋由河中而遷也据宰相表十五年二月癸丑趙隱檢校兵部尚書鎮

海軍節度使仁表當爲趙隱所辟矣仁表字休範
兩傳不書而全唐詩有之孔紆則兩書皆無傳誌
云公娶京兆韋氏山東清甲家也清甲二字未詳
紆只一子鐵婢而云二子者女亦爲子也此誌撰
者自稱或余或愚不一蓋漸有不署其名者矣

魏公先廟碑

碑上下殘缺現存者高五尺五寸五分廣
四尺三寸六分三十六行字數無考正書

上缺

判戶部事上柱國賜紫金魚袋魏公先廟碑銘序

上缺

國博陵縣開國子食邑五百戶賜紫金魚袋崔

瑱纂

上缺 柱國河東郡開國公食邑二千戶柳公權書并

篆額

上缺 特進侍中贈太尉鄭國文貞公魏氏在貞口立家

廟于長安昌樂里後二百卅五年有來口口 缺 歲既協

于 帝道化光洽前此 詔贈先口口口侍御史口

君爲吏部侍郎先夫人南陽口口口 缺 姓曰吾惟聖訓

祭器不假宗廟爲先今吾口口德慙前人而口位卿相

歲時尚祭寢軼然崇祀口口 缺 廟而新之則流光歸

列祖雖然吾非達禮必稽于有司口口太常順考禮令

酌損前文口勲勞口口 缺 考公於是靖端虛中列上威

疾既獲 俞命□□□□□□□□書練時日□工興

事陶新築□堅□□缺物宿設助祭夜鼓四通公祗祿

夙興纓冠鳴玉入進于位賓親就□祝史贊導虔奉

祖考鄭公□□□□缺部府君諱躬□神主第升于室

室上□□以 祖考妣鄭國夫人□東裴氏皇考妣河

東裴氏王考妣□缺□之事既成而退他日使門吏

左補闕鄭愚□謂瑛曰其滌慮虔思□教以移忠竭忠

以致位因位以□□□缺詳求能敵予之重託者宜莫

如子瑛聞命震悚卽走相君之門固辭不獲歸次其止

冑德行官業垂承烈休□缺文侯能師聖門人而不好

古樂故風類而不得口五伯至無忌不口口而封信陵
與齊趙楚公子相矜奮口口

缺

派緒滋廣因自別爲西

祖暨諸戎盜華晉鼎凌口口口口遷廿仕口口頓丘四

廿之孫曰鈞樹勲捍難爲口口

缺

懷忠亂朝直封誼政

侵轍紆倖不容於時出長屯留口無愠色或有口詞致

誦者方激發慨吒志氣橫厲口口

缺

屬時濁昏助勦西

東懷竒含耀濡足口晦竟逢 大晨助 日口口

龍攄鳳鳴爲祥輔昌口

我缺

口見國書爲臣

克配於 國享爲祖不遷於家祀雖童子婦人亦口口

口口口口口口口府君諱口琬祖訓 缺口潛於廿次爲

顯考以 相國位猶滯於三品室未備數尙口孝思司
業口潁州府君是爲第口室 缺口之跡口口口口宜
孰歸第三室河西府君天資恢口抱器卓邁口無不通
而以先德實嘗口口口口口口 缺司成師儒道光教
源益口口口口殘躡狼藉牛空於竊耕無以力乃用古
口口口口犁作爲區口歲大有口宿秉口口 缺積慮洽
聞業履無忝命塞不口口蔽罪無頗邑長獲申剛中
特操前無口口口口是舉出爲口口猗氏令人咸爲口
缺於特爲邑南陽當希烈猖獗之餘邑口口機難口口
中口口立德無方而口口口口蘊之華藻當時賢口述

聽風□□缺長有爲中貴人干政者違言交肆

□□□□ 各拜大理司直□□□□小大時當性

不苟合□□當官□缺四室卽吏部府君渾粹秀發議

洞元□□□□□□□□北四廿無□□□□沒

振謂天道□□ 相□求之□缺遷始以大理評事兼

監察換殿中侍缺鄭公忘勞大伐爲缺可朝聞夕拜疏

視□缺文宗益欲實於側卽□缺終始一德命求昆裔

期肖前人以缺上書草充溢囊篋使好事者得之皆缺

索將勇□整易干城之不材者蚤缺故會昌中權倖惡

忌擠之外郡閒□缺材以成之厥後綿歷祀業爲他人

□□^缺 征兼領邦憲間歲進防公台仍專^缺 中被褒朝

天又嘗故廟奉時□□□^缺 之舊宅末與里肇卜貞

觀^缺 猗猗後爲右補闕至公恭守□^缺 爰操璧□

皇□廊端□□^缺 銘石於麗牲其烝夷之志歟^缺

□居第奉祠不敢□爲衮職舊官□^缺 孔昭厥緒益

遙人爵或替^缺 □綏嘏錫□□□□□考私□□報^缺

魏還祖居旌直 恩購^缺

□聞躬潔裸羞俎折^缺

□□□□□

□□□□□ 南□□

缺

□□□□□□□□

缺

□猶在□□言之□□□

缺

右史入侍未嘗不□之

缺

□□□□□□□□

缺

征繕是圖□□□府大體

缺

□

缺

□維忠與孝可謂大備

右碑石裂爲五其四石可次序末十行文不接續故

附于後

王濤記

按此碑殘缺標題但存判戶部事上柱國賜紫金

魚袋魏公先廟碑考其文則鄭國公魏徵之廟而判戶部事不知何人唐書宰相世系表徵之子孫中未有判戶部事者兩唐書徵之後惟五世孫蕃和宣宗傳甚詳而其子亦不言判戶部事然魏公先廟始建爲祀鄭公而重修則爲祀蕃碑云鄭國文貞公魏氏在貞觀立家廟於長安昌樂里檢長安志昌樂坊在京城朱雀街東第二街有太子太師鄭國魏徵家廟大中中來孫蕃爲相再新舊廟以元成爲封祖元成者鄭公之字也則似廟爲蕃所重修蕃之新廟在大中中則碑亦當立于大中

年然以碑文證之文云貞觀立家廟後二百卅五年又云顯考相國位猶滯于三品室未備數顯考相國卽謂謬也謬官平章事在大中十年其卒在十二年廟之始建不知在貞觀何年据鄭公卒于貞觀十六年卽以是年爲始至二百卅五年爲僖宗乾符三年則長安志以爲大中新廟者未覈也碑文撰者崔璵結銜存博陵縣開國子璵傳載封博陵子在大中七年碑書鄭公爲祖考其下云皇考妣王考妣玩其文稱祖考妣者始封之祖也皇考妣者曾祖考妣也王考妣者祖考妣也其後

所叙世次頗詳而文多缺泐不得見其全矣碑不能確定其歲月姑附咸通之末

謁昇仙太子廟詩刻

石橫廣二尺九寸六分高二尺廿五行行十七字正書在偃師縣南緱山下仙君觀

謁昇仙太子廟

在昔靈王子吹笙遡沈寥六宮攀不住三島耳相招亡國原陵古賓天歲月遙無蹊窺海曲有廟訪山椒石帳龍虵拱雲樓彩翠銷露壇裝琬礪真像寫松高珠館青童宴琳宮阿母朝氣輿仙女侍天馬吏兵調湘妓紅絲瑟秦郎白管簫西城邀綽約南嶽命嬌嬈句曲觴金洞

天台嘯石橋曉花珠弄藥春茹玉生苗二景神光秘三元寶錄饒霧垂鴉翅髮冰束虎章腰鶴馭爭啣箭龍旭各獻綃衣從星渚浣丹就日宮燒物外花常滿人間菜自凋望臺悲漢戾闕水笈梁昭古殿香殘炮荒堦柳長條幾曾期七日無復降重霄嵩嶺迴天漢伊瀾入海潮何由得真訣使我珮環飄

余大中八年爲前渭南縣尉閑居伊洛常好娛遊春夏之交獨登嵩少路由緱嶺謁昇仙太子廟雲

霞之志於斯浩然遂構詩一章用申擬慕今者謀塵樞務已及四年忽覩成庶大夫奏牋請以

應元廟李尊師配住賓天觀則知維巖靈宇 儀像
重新輒寫舊詩寄 王公請標題於廟內軋符四
年閏二月三日開府儀同三司行門下侍郎兼兵部
尚書平章事監修國史鄭畋記

朱長文墨池編有此詩詩爲五排字似石經體後有
字云余大中八年爲前渭南縣尉又自署云開府儀
同三司行門下侍郎兼兵部尚書平章事監修國史
按劉昫唐書鄭畋傳云畋字台文滎陽人也以書判
拔萃授渭南尉又云乾符四年遷吏部侍郎尋降制
曰可本官同平章事僖宗上尊號禮畢進授中書侍

郎進階特進轉門下侍郎兼禮部尚書集賢殿大學士頗與碑合惟史誤兵部爲禮部當以石刻正之傳又稱畋文學優深器量宏恕美風儀神采如玉尤能賦詩與人結交榮悴如一然則當益貴其詞翰矣

中州

金石記

按鄭畋詩一首附記云余大中八年爲前渭南縣尉閒居伊洛常好娛遊按新唐書畋本傳以書判拔萃擢渭南尉父喪免宣宗時白敏中令狐綯繼當國皆怨德裕其賓客並廢斥故畋不調幾十年然則畋自謂閒居伊洛蓋由此也又云今者謬墜樞務已及四

年宰相表乾符元年鄭畋爲兵部侍郎翰林學士承
旨計此時標題之歲正在四年與史悉合畋崎嶇危
難忠以濟主故得其詩記尤可喜也畋名殘其半然
推證悉顯據而金石攷謂無姓名豈未見末幅耶詩
在昔靈王子刊本在三書互相招刊本互作去曉花
珠弄藥刊本曉龍妃各獻綃刊本如誤作紀各作物
外花長滿刊本長嵩嶺徂天漢刊本徂今悉依石本
爲正僊師金石

遺文記

按鄭畋詩後記云余大中八年爲前渭南縣尉舊

唐書傳畋年十八登進士第二十二又以書判拔

萃科授渭南尉則其作尉時年僅二十二矣以改
之卒年攷之舊傳云中和三年薨年五十九新傳
云卒年六十三若從新傳年六十三則生于長慶
元年當大中元年作尉時年三十四卽從舊傳作
五十九其作尉時年亦三十皆與年二十二之語
不合又記後結銜云乾符四年閏二月三日開府
儀同三司行門下侍郎兼兵部尙書平章事監修
國史宰相表乾符二年六月鄭畋爲門下侍郎四
年正月兼兵部尙書與碑合而兩傳則各不同舊
傳云乾符四年遷吏部侍郎同平章事僖宗上尊

號禮畢進加中書侍郎進階特進轉門下侍郎兼
禮部尚書集賢殿大學士上尊號事舊僖宗紀不
載新紀則在乾符元年十一月新傳云僖宗立以
兵部侍郎進同中書門下平章事再遷門下侍郎
無四年兼兵部尚書之事蓋紀傳碑表互異若此
不能定其孰是也

武安君白公廟記

我本詩廣行字皆不
計正書在咸陽縣

唐宣徽修造使准

勅重口秦將武安君白公廟記

編以武安君威靈振古術略超時播千載之英風當六

雄之鯨敵廟貌雖存於近縣詹 聖上思費已甚於荒
涼念道蹤□□□令當司見膏冀存□美不泯歲時寂
裳□□劍佩嚴整倬尔 □跡感發 宸聰劑

繞施堂宇光榮興功□畢禋祀備周刊石貞珉用資不
朽其所添置物色具列於後

舍大小共五十二間並□□□堂三間五架 覆堦三
間 三面行齋舍廿五間 獨間門屋一口 南行眺
子舍一十間 蓋頂木帳一所并堂前面沙于三間及
散博□□並創置

武安君捏塑重修裝飾及創置葦一顏并紫衣一口四

事口銅 腰帶魚袋并口裙褥一副生銅香爐一枚
木合一具

夫人捏塑重修裝飾及創置錦衣一幅四事并朝花

侍從二人捏塑並重修裝飾壁畫武安君及夫人并侍
從兩面音樂引隊軍將鞍馬等並重修飾 南面創

畫土番蠻奴各一人口堂門外捏塑軍將二人口畫捉
生官健及戟架弓箭器械並創置南廊下石押口影并
口口並重修畫堂兩面栽竹各一叢并口創置口西水
巷道創置零星門并鑲鑰八株舊有口口十三株新栽
廟內柏樹九十一株口

乾符五年歲次戊戌十二月一日記

監修承旨文林郎行內侍省掖口局丞員外置同正員上柱國張師厚

使太中大夫行內侍省內侍員外置同正員上柱國賜紫金魚袋田獻誅

廟在今咸陽東古杜郵起慘刻獨有將略耳亦祀至今何也壁間記唐乾符五年重修事正書道勁亦有歐法知唐世官牒無不作佳書也記中所列添置物色有眺子舍一十間沙子三間牽一顏石押衙影等

皆不可曉

石墨
講華

李克用題名

石高四尺四寸廣二尺四寸九行
行十九字正書在曲陽縣北岳廟

河東節度使檢校太保同中書門下平章事隴西郡王
李克用以幽鎮侵擾中山領蕃漢步騎五十萬衆親來
救援與易定 司空同申 祈禱翌日過常山問罪時
中和五年二月廿一日克用記

易定節度使檢校司空王處存看題

至三月十七日以幽州請就和斷遂却班師再謁辟容
兼申 賽謝便取飛狐路却歸河東廿一日克用

重記

天會十二年七月六日尚書都官員外郎知曲陽縣事高君陳摸刊

按舊唐書云時天子播越中原大亂幽州節度使李可舉鎮州節度使王鎔以河朔三鎮休戚事同惟易定二郡爲朝廷所有乃同議攻處存以分其地又云幽鎮兩藩兵甲強盛易定於其間疲於侵寇賴與太原姻好每爲之援卽其事也又按宋沈括筆談云嶽祠在幽陽祠中多唐人故碑殿前一亭中有李克用題名則知此字乃當時所刻或毀於靖康之兵火而金人重刻之今石也然克用將門之子何能工於筆

法乃爾豈亦如宣和書請謂後梁太祖批答賀表當

是筆吏所書之類與

金石文字記

曲陽縣北嶽廟有唐李克用題名一百二十八字文
稱中和五年二月者卽光啟元年攷僖宗以是年二
月至鳳翔三月還京改元之詔猶未下也克用與義
成節度使王處存同破黃巢以功封隴西郡王而盧
龍節度使李可舉成德節度使王鎔惡處存約共滅
之分其地通鑑載克用遣將康君立救之而碑文則
云領蕃漢步騎五十萬衆親來救援與通鑑異又云
至三月幽州請就和斷遂班師取飛狐路却歸河東

則又史所不及載者當唐之季藩鎮連兵境上各事
爭鬪職方不錄其地朝廷號令所及僅河西山南嶺
南劍南十數州上下不交以至于無邦生斯世者其
聞見已不能悉真况百世之下寧免傳聞異詞哉惟
金石之文久而未泐往往出風霜兵火之餘可以補
舊史之闕此好古之士窮搜于荒陬破冢之間而不
憚也克用本武人未嘗以知書名而碑文楷畫端勁
詞亦簡質可誦英雄之不可量如是夫嗚呼益以見
金石之文爲可寶也

曝書亭集

知曲陽縣孫君陞陸於縣北安天廟掘地得唐中和

五年碑一按舊唐書中和五年三月丙辰朔丁卯車駕至京師己巳御宣政殿大赦改元是三月之十四日已改光啟曲陽去京師遠故未知耳又克用親授處存與通鑑道將康君立事異曠書亭集謂可補舊史之闕然克用史無太保之稱處存以檢校司空遣大將張公慶率勁兵三千合諸軍滅賊巢于泰山以功檢校司徒事在救中山前則救中山時不宜仍稱司空又金史百官志六部尙書皆有員外郎而無尙書都官員外縣有令判縣事而無知縣事皆事之待

考者

拓坡集

右河東節度使李克用題名沈存中筆談載其文云
太原河東節度使李克用親領步騎五十萬問罪幽
陵回師自飛狐路即歸雁門雖櫟括其詞然以石刻
校之殊未盡合蓋存中記憶偶誤爾唐書沙陀傳光

啟元年即中和五年幽州李可舉鎮州王景崇言易定故

燕趙境請取分之於是可舉攻易州下之景崇攻無

極易定節度使王處存請救于克用克用自將救無

極敗鎮人攻馬頭固新城鎮兵走處存復取易州此

克用題名即自將救處存時也克用以二月廿一日

與處存同禱嶽廟至三月十七日以幽州請和班師

復謁廟賽謝然則克用之破鎮兵當在二月之末三月之初矣通鑑于是年三月書克用遣將康君立救處存又于五月書克用自將救無極敗成德兵皆未得其真沙陀傳稱進檢校太傅而此作檢校太保亦當以石刻爲正

潛研堂金石文跋尾

晉王題名攷新唐書李茂勲傳中和末太原李克用始強大與定州王處存厚相結可舉惡其窺山東爲己患云云乃遣票將李全忠率衆六萬圍易州鎔以兵攻無極處存求援太原克用自將赴之今以題名推數中和五年二月以後卽改元光啟故史云中和

末史又云克用自將赴之亦與此親來救援合惟通
鑑謂遣將康君立救處存或克用爲主帥以君立佐
之遂以異文也與左傳正義云僖二十三年晉侯親
自敗狄而卻缺爲將或十六年楚子親戰鄢陵而子
反爲主類如此者不可更僕數故例舉以見其非誤
也題名下小字天會十二年一行則此題至金已重
刻然不知原刻何以見毀也

授堂金
石跋

按中和五年李克用與王處存同禱于嶽廟克用
題記而處存看題看題二字獨見于此

撫州寶應寺鐘款

鐘不知高幾許其中一層上圍一丈六寸下圍一丈一尺五寸五分界爲八區內四區區又界作四棧以問之其第一區九行其八行刻記每行字數十四十六十五不等第二區四棧無字第三區另刻宋淳化年陀羅尼十五行行二十四二十五二十六字不等餘第四第六兩區皆四棧七行第五區十一行第七區五行第八區四棧八行皆書官銜及助緣人名字數自十八至三十不等正書

節度討擊使兼監察御史朱袞并書

維唐大順元年歲次庚戌拾月癸未朔拾壹日癸巳撫

州寶應寺募衆緣於洪州南冶鑄銅鍾壹口重叁仟斤

上爲

國王大臣當府

司空郡王

尚書

次及州縣文武官寮將士軍人什方信男信女師僧父母然願國界安寧法輪常轉有識舍靈同霑此福永充

供養

金紫光祿大夫檢校工部尚書使持節撫州諸軍事

口撫州刺史兼御史大夫上柱國危全誡

以上第一區

攝洪州別駕銀青光祿大夫檢校國子祭酒兼御史大夫上柱國危巨

軍事判官將仕郎試太常寺協律郎孫可璠

攝長史銀青光祿大夫檢校太子賓客雲麾將軍試殿中監兼御史中丞朱口立

攝司馬兼御史中丞周璣

攝錄事參軍李知中

節度先鋒兵馬使充都押衙銀青光祿大夫檢校國

子祭酒兼御史中丞曾司徒

押衙充右直將兼侍御史曾宏立

押衙充左直將兼侍御史陳玕

押衙充右廂都虞候兼侍御史丘盈

押衙充左廂都虞候兼侍御史李宣

押衙充衙官將兼侍御史丘稔

押衙充衙官將兼侍御史謝君注

以上第五區

軍事衙推攝臨川縣令將仕郎試太常寺奉禮口黃

口

節度左押衙銀青光祿大夫檢校國子祭酒兼御史

中丞危堯

助緣押衙兼侍御史吳奏 押衙兼侍御史吳堯

押衙曾口 押衙許懷 押衙謝口福 押衙湯俊

押衙李耿 押衙徐殷 押衙席湘 押衙康貢

押衙姚扶

孔目院助緣子錄事蕭恭 口押衙黃緒 糧料官

傅口 以上第六區

衙直官王蕩 表奏官骨元藻郭玩黃謹黃口

口口口衙口孔目官口口口

節度討擊使軍事押衙知修造將黃遵

押衙充孔目官兼監察御史劉濱

押衙兼監察御史黃肇

以上第七區

前鄆岳館驛巡官朝議郎試大理評事黃涉 前商

州上洛縣令蘇口

攝功曹參軍夏侯徽 前潭州長沙縣丞黃名

女弟子吳氏 蕭氏

助緣 盧玘 曾儼 金孜 鄭遇 饒璠 王閔

傅恭 劉勃 鄭口 饒意 許縱 虞瑛 查

京 許遠 李謝 熊立 謝展 張遵 范運

鄒矩 劉憲 鄒約 舒慶 周智 楊珠 胡成

何啓 章玩 王存 毛法修 彭贊 宗爽

以上

第四區

監寺大德僧有章 法主律大德僧知夢

尊宿大德僧惠修 道滿 令交 藏主僧敬摸都

准口僧懷閏

寺主僧知遠 上座僧元暢 助緣僧行哲 景璋

頭陀僧德口

勾當鑄鍾僧敬倫 都料節度散將桂宏師 節度

子將胡璋鑄

徒衆僧元珣 師達 行求 雲宣 靈口 師徹

知儼 □□龜

了源 軋顛 匡一 守言 可遷 元暉 雲寶

師□ □□

敬儻 從本 令□ 敬遷 德昭 師怛

道成 宏愿

以上第
人區

□聖觀自在菩薩甘露陀羅尼

咒不
錄

淳化元年歲在庚寅十二月 寶應寺觀音院行持

水陸法事忽持大德敬□記

以上第
三區

延福鐫

右撫州寶應寺鐘文其云當府司空者鎮南軍節度

使鍾傳也郡主尚書者撫州刺史危全諷也列名者
百餘人首一行云金紫光祿大夫檢校工部尚書使
持節撫州諸軍事守撫州刺史兼御史大夫上柱國
危全諷攻全諷以中和二年壬寅歲據撫州至梁開
平三年己巳爲楊氏所併在州二十八年唐五代二
史僅附見鍾傳傳其檢校工部尚書亦可裨二史之

關

潛研室金
石文跋尾

金石萃編卷一百十七終